



## Journées du livre et du droit d'auteur

17.-21. Abrëll 2023

### Net reell?! – Fantastesch Geschichten

*Eng Proposition vum  
Ministère fir Educatioun, Kanner a Jugend*

Ëm wat geet et?

Geschichte fërderen d'Fantasie. D'Kanner kënnen a friem Welten andauchen, sech an aner Personagé versetzen an Empathie entwéckelen. *Net reell?! – Fantastesch Geschichten* sinn duerfir d'Journées du livre et du droit d'auteur 2023 iwwerschriwwen. Dobäi huet dëst Thema zwou Facetten. Engersäits geet et ëm literaresch erfonde Geschichten, déi d'Lieserinnen an d'Lieser an eng aner magesch oder fantastesch Welt wëlle féieren. Anerersäits geet et ëm bewusst verdréinte Geschichten (Ligengeschichten), déi wëllen iwwerzeegen, datt si reell sinn.

D'Thema méi am Detail

Wie géif bestreiden, datt Bicher eng eege Welt schafen? Verschiddener entfieren hir Lieserinnen a Lieser esouguer an e mageschen Universum. Bei deene Jéngste geet et mat de Mäercher lass, duerno komme gäre Fantasiegeschichte mat Hexen, Zauberer, Draachen an anere Fabelwiesen.

Verschidden Auteuren hu ganz Zukunftsvisionen entworfen, déi zu hirer Zäit irrealisteschen waren, elo awer deels vun der Technik iwwerholl goufen. An der Fantasy oder Science-Fiction gëtt et esouwuel ganz positiv Entwërf (Utopien), wéi och ganz däischter Welten (Dystopien). Modern Wierker an deem Genre behandelen dacks aktuell Theeme wéi de Klima, d'Verdeelung vun de Ressourcen oder gesellschaftlech Tendenzen, déi jonk Lieserinnen a Lieser interessieren.

All dës Zorte vun erzielender Literatur kënnen 2023 genotzt ginn.

Mee och am Beräich vun der Sachliteratur fënnt ee vill Bicher, déi sech mat der Zukunft ausersetzen. D'Sujete sinn technesch Entwécklungen, kënschtlech Intelligenz oder ganz allgemeng d'Zesummeliewen vu muer.

Allerdéngs huet d'Fantasie eng zweet, méi riskant Facette. Wann een net oppasst, da ka séier aus enger Rumeur mat beschtefalls engem Kär vu Wourecht e Fakt ginn, wann och verdréint an opgebauscht. Och dat ass eng "fantastesch" Geschicht, déi als gesécher gëllt, am Fong awer näischt oder wéineg mat der Wourecht ze dinn huet. Dës Manipulatioun geschitt deels onbewosst, deels ganz absichtlech. Natierlech gëtt et zu dësem Aspekt eng Hickecht Wierker, beispillsweis Billerbicher, déi d'Kanner sensibel un d'Theema Rumeuren eruféieren.

D'Tatsaach, dass fantastesch Geschichten d'Leit faszinéieren, gëtt dacks bewosst benotzt fir Hallefwourechten, Rumeuren a Ligen am grouse Stil ze verbreedden. Duerfir steet haut de Begrëff "Fake News". Do geet et dacks ëm sensationell Geschichten oder dorëms, anere bewosst ze schueden oder Schlechtes iwwer si ze verzielen. Mee d'Auteure vun dëse "Geschichten" wëllen den Androck vermëttelen, dass si stëmmen. A ville Fäll ginn dës Erzielungen an de soziale Medie verbreet.

Fir d'Journées du livre et du droit d'auteur ka mat de Kanner gekuckt ginn, wéi Fake News entstinn, wéi een se erkennt a wéi een sech dogéint schütze kann. Et soll een net alles gleewen, an och selwer keng där "fantastesch" Geschichte verbreedden. Et geet och drëm, en Esprit critique par rapport zu esou Erzielungen opzebauen.

An der erzielender Literatur fënnt een awer och Geschichten, an deenen d'Wourecht verdréint gëtt : Do gëtt iwwerdréiwwe, opgebauscht oder carrement gelunn. Ee Grond duerfir ass z.B. fir sech selwer ze schützen, wann ee schlecht drun ass a sech schummt, oder fir besser do ze stoen. Dacks geet et drëms, seng Wierklechkeet méi schéin duerstellen, wéi se reell ass.

D'Theema 2023 kann also op vill Manéiere mat Liewe gefëllt ginn.

Wat ka gemaach ginn?

Op der Homepage vum SCRIPT <http://www.script.lu> an am CEN 12/22 fannt Dir eng Bibliographie mat e puer aktuelle Kannerbicher zum Thema Rumeuren, Ligegegeschichten a Fake News. Et ass e klengen Choix – an de Schoulbibliothéike si bestëmmt vill Bicher zu alle Facettë vum Thema.

Zum Motto vun 2023 bidde sech villerlee Aktivitéiten un, wéi z. B.:

- Bicher oder Geschichten zum Thema liesen oder virliesen,
- Geschichte mat magesche Wiese liesen,
- Fantasiegeschichte schreiwen,
- Mäercher erzielen, liesen a mat Kanner opbereden (2023 ass e Gedenkjoer vun de Gebrüder Grimm),
- Klassiker vu fantastescher Kannerliteratur nei entdecken : 2023 ass e Gedenkjoer vum C. S. Lewis (Narnia) a vum Lewis Carroll (Alice in Wonderland),
- Utopien an Dystopië liesen,
- Kanner nei Welten oder fantastesch Zukunftsvisionen erfanne loossen,
- Fréier an aktuell Zukunftsvisionen vergläichen z.B. mat Bicher vum Jules Verne,
- Sachbicher iwwer Magie an Illusionen notzen,
- Mat Hëllef vu Science-Fiction Zukunftsszenarien ausdenken,
- Klassiker vu Ligegegeschichten nei entdecken (Pinocchio, Eulenspiegel, Baron Münchhausen) a Parallelgeschichten dozou schreiwen,
- Nei Ligegegeschichten entdecken,

- D'Kanner Ligegegeschichten erfanne loosse,
- Biller- a Kannerbicher iwwer Rumeuren liesen a beschwätzen,
- Mat Sachbicher d'Kanner fir Fake News sensibiliséieren: kucken, wéi se entstinn, wéi se verbreet ginn a wéi een dorobber reagéiere kann,
- Mat Sachliteratur an Onlineinformatiounen no Krittäre kucken, déi et erlaben, Fake News ze erkennen,
- Eng kleng Geschicht erfannen a se iwwert „Stille Post“ weiderginn fir ze kucken, wéi se sech verännert huet.
- ...

Et kann een zu dësen Aspekter:

- Geschichte liesen a virlesien, beschwätzen, verännere, weiderspannen, aus enger anerer Perspektiv erzielen (Audiodatei, Textdokument oder Multimediadokument, Video, StopMotion...),
- Eng Geschicht als Lesetheater ämschreiw an/oder opféieren (Video),
- Eng nei Geschicht erfannen, opschreiw an illustréieren (*Textdokument oder Multimediadokument*),
- Eng Geschicht mat Figuren/Objeten noerzielen an déi an e Schongkarton maachen (Book in a box) <https://www.edumedia.lu/lesson/book-in-a-box/>,
- En Trailer zu engem Buch maachen (Booktrailer) (eventuell fir en C4) <https://www.edumedia.lu/lesson/booktrailer-spannender-kann-lesen-nicht-sein/>
- Eege Geschichte molen, schreiw an oder Fantasiegeschichten erfannen
- asw.

Wéi kann ee matmaachen?

Als Klass, Zyklus oder ganz Schoul.

D'Responsabel aus der Schoulbibliothék sinn d'Kontaktpersone fir déi Aktioun.

Umeldung (iwwert de Schoulbibliothecaire): mam Onlineformulaire bis den 10. März 2023 : <http://www.edulink.lu/pkpm>

Wat geschitt mat den Aktivitéiten, déi gelaf sinn?

A jiddwer Schoul sollen d'Aktivitéiten dokumentéiert an déi Dokumentatioun bis den 12. Mee 2023 erageschéckt ginn.

Flott wier et, eng kleng schrëftlech Beschriewung vun den Aktivitéite mat e puer Fotoen an digitaler Form (Fotoen an 300 dpi-Printqualität) ze kréien. Denkt wgl. drun, d'Autorisatioun vun den Elteren ze froen, wa Kanner op de Fotoe sinn. Schéckt d'Dokumentatioun wgl. per Mail un: [anne-marie.antony@men.lu](mailto:anne-marie.antony@men.lu) / [anne.biesdorf@men.lu](mailto:anne.biesdorf@men.lu).

De SCRIPT offrëiert Bicherbongen un d'Schoulen, déi matmaachen. Dës Schoule ginn och am Courier de l'Éducation nationale 04/2023 ernimmt. An engem spéidere Courier de l'Éducation nationale gëtt zousätzlech nach e Réckbléck op d'Aktioun gemaach.

D'Ekipp vum SCRIPT wënscht Iech an Äre Schülerinenn a Schüler vill Freed bei den Aktivitéiten a seet elo scho Merci fir d'Matmaachen.